

## Presidente di parlamento Ady Thijsen: “Ma cuminsa e reunion cu nan tur tabata eyden”

**Diahuebs ultimo tabata un dia cu basta polemica den organo legislativo di Aruba, por a keda conoci cu durante un reunion publico di Parlamento cu tabata atende e asunto di tiramento di pisca e parlamentarario di lider di fraccion di partido MEP Rocco Tjon a trece dilanti un mocion di desconfianza pa minister Marisol Lopez Tromp.**

E mocion aki a conta cu 10 voto na fabor, 8 di parti di e fraccion geel y dos di parti di e fraccion blauw, pero manera ta conoci ta 11 voto of mas cu mester tin pa por pasa un mocion asina of un ley, pero segun presidente di parlamento Ady Thijsen esaki tabata na su luga aunke no tabatin presencia di parlamentarionan di partido AVP ni di partido di RED cu a argumenta cu nan no tabata di acuerdo cu e accion aki.

Ayera mainta, el a yama medionan local pa splica durante un conferencia di prensa pa via di cierto speculacion cu e noticia aki a causa riba rednan social, el a menciona cu e decision pa loke ta trata e mocion di desconfianza pa minister di Infraestructura, Medio Ambiente y Desaroyo Teritorial Marisol Lopez Tromp ta valido, “nos ta traha segun e ley y segun nos constitucion”, el a sigura.

Asina mes, el a conta cu pais a enfrenta cu e situacion di Covid-19 y cu den parlamento nan a haya tres per-

sona cu a wordo contagia di e malesa aki, den ora ey nan a yega na un acuerdo segun e reglamento di ordo cu Thijsen a comenta cu pa haci un cambio, por haci'e pero tur e 21 parlamentarario mester ta di acuerdo.

Di esaki, el a splica cu nan a traha un regla cu tur di nan tin cu pone cu nan ta bay di acuerdo, -incluyendo e parlamentarario di partido AVP Michael Lampe cu na e momentonan aki ta na Hulanda y cu tambe mester duna su aprobacion-, cu esaki a wordo implementa desde maart di e aña aki y tur e reunionnan a bay asina.

Di loke ta trata e situacion di diahuebs ultimo, Thijsen a indica cu na e momento cu nan a cuminsa e reunion cu mester tin 11 hende minimo pa cuminsa e reunion, el a sigura cu 18 persona a firma y di eynan e reunion a cuminsa cu su prome ronda, di dos ronda tambe a bay door, despues a bin tres mocion cu a wordo entrega y e reunion a yega na su fin.

Tocante e mocion di desconfianza cu parlamentarario Tjon a entrega, Thijsen a bisa cu ora esey a wordo entrega otro personanan caba ya tabatin conocimiento di esaki y ora ministernan a papia nan a pidi pa schors e reunion y asina nan por mira kico nan ta bay haci. Asina mes el a sigura cu na e momentonan aki tabatin mas cu 11 persona den sala.

“Na e momento ey a mi por cuminsa cu stemmen, pasobra mi tin mas cu 11 hende eyden”, el a enfatisa.

Despues di esaki, el a sigura cu parlamentarionan di fraccion di AVP y RED a sali y bay pa motibo cu nan a abstene, “si nan tabata kier pa e coy no bay door nan no a mester ni bin den sala sino, a mi no por cuminsa cu stemmen pasobra mi no tin 11 hende, ma cuminsa e reunion cu nan tur tabata eyden”, Thijsen a señala. “E punto importante ta cu e procedura a bay bon y no bin hunga wega cu a nos ta haci e trabou aki di un manera cu nos no ta haci'e bon y a mi como presidente di Staten mi ta carga e responsabilidad pa esaki” Thijsen a enfatisa.

Tambe, el a trece dilanti cu e topico ta di piscadonan y nan a bay na dos reunion publico despues nan a bay un openbare vergadering, y nan a acepta cu nan tabata presenta un solucion ayera, lo cual tabata e orden, nan a dedica tempo na esey “te ora cu minister Lopez-Tromp a dicidi di tira riba e parlamentarionan cu nan ta insinua y acusa cu nan ta traha contra ley e ora ey el a crea un kiebro entre parlamentarionan y lamentablemente e mester bay asina”, Thijsen a declara.

Den mesun linea, el a comenta cu ni un minister no kier mocion di desconfianza y cu minister Lopez-Tromp tin tur derecho di bisa cu esaki ta inhumana, “e tin su derecho di sinti esey y e tin su



derecho di cana su caminda”, pero cu no ta e esun cu a dicidi, den caso aki parlamento tabatin un mocion y esey a wordo acepta den manera cu nan a vota, awor e ta keda na gobierno pa bay gobernador.

Ta importante pa trece dilanti cu na e momento di ciere

di edicion aki, gobernador Alfonso Boekhoudt a yama presidente di parlamento Ady Thijsen pa tene un reunion cun'e.

Thijsen a relata cu e reunion aki a “bay bon”, sin duna mucho detaye.

## Marisol Lopez Tromp ta considera paso di Presidente di Parlamento peligroso “Mi ta Minister ainda”

**Marisol Lopez Tromp ta Minister ainda. Asina el a informa Bon Dia Aruba. Lopez Tromp no ta considera e votacion riba e mocion di desconfianza contra su persona como uno legal, ademas cu e argumento uza no ta valido tampoco. Te cu merdia, Lopez Tromp no tabatin un combersacion cu Prome Minister Evelyn Wever Croes, kende unicamente a mand'e un whatsapp pa bis'e cu e no a sigui reunion publico pa motibo di reunionnan.**

Los di e ilegalidad di e votacion, segun Lopez Tromp, tin e esencia di e mocion su contra: “E argumento den e mocion no ta corecto. Nan a pone cu ta parce manera mi no ta bay ehecuta e maneho di tolerancia, esta e gedoogbeleid. Esaki, mientras cu mi a bisa na varios biaha, cu mi a busca hopi

consejo pa trece e miho producto di ley. Y ademas. Ta Minister di Husticia Andin Bikker mester ehecuta e gedoogbeleid atraves Warda Costa y Minister di Sector Primario, Cris Romero, mester ehecuta e registracion y duna cursonan. Ami a haci mi parti caba y lo sigui proteha naturalesa.”

A puntra Minister Lopez Tromp si el a papia cu Dellanira Maduro, lider di e fraccion di POR, e partido cu a nombr'e como Minister, y e contesta tabata simpel. “No.” Pero e no ta bay considera e mocion mes, pasobra “e no tin validez si e tin menos cu 11 voto na fabor. Si acaso bira asina den Staten, cu menos di 11 hende ta sostene un decision, e ta nifica cu ta actua contra Constitucion y ta hopi peligroso pa estado di derecho.” Lopez Tromp, kende tambe a fungi como Presidente di

Parlamento a sigui bisa cu “Covid no por ta motibo pa trapa Constitucion y keda maluza pa baha un Minister di e pais sin cu tin quorum. Un Minister ta nombra segun un landsbesluit y e ta traha pa Aruba.”

Lopez Tromp ta lamenta cu ta uza e reunion publico riba Spearfishing, y e piscadonan cu mester di ayudo, pa crea e impresion cu e no ta di acuerdo pa duna un yudansa.

Bon Dia Aruba a puntra Minister Lopez Tromp di con e ta sigui como Minister, mirando cu e ta obvio cu su propio fraccion y particularmente fraccion di MEP no kier e. Su contesta tabata corto y sin mucho splicacion. “Bon pregunta.”